

我等當得取上菩提即學彼王發菩提心佛告大衆尔時普覆王者豈異人乎今文殊師利菩薩是也彼於往昔過七十萬阿僧祇恒河沙劫初發菩提之心次過六十四恒河沙劫得無生法忍能具足菩薩十地如來十力佛地諸法悉皆圓滿而未曾起一念之心我

十五末

當得佛善男子尔時二十億衆生隨逐彼王於雷音佛所發菩提心者皆由文殊師利勸發令入布施持戒忍辱精進禪定智慧今並證得阿耨多羅三藐三菩提轉大法輪作佛事已而般涅槃文殊師利皆悉供養彼諸如來亦皆護持彼諸佛法唯有一佛號地持山在此下方過四十恒河沙刹土其佛世界名曰地持亦有無數諸聲聞衆佛壽無量于今現在說此文殊師利宿緣之時衆中七千衆生發阿耨多羅三藐三菩提心

大寶積經卷第五十九

官九

飢饉正下穡用上六矜高上反凌蔑上反結下反
弦歌上音鼓吹下尺

大寶積經卷第六十

官十

大唐千闍三藏實叉難陀譯

文殊師利授記會第十五之二
尔時師子勇猛雷音菩薩白文殊師利言仁者已滿足十地及如來十力一切佛法悉皆圓滿何故不成阿耨多羅三藐三菩提文殊師利言善男子無有圓滿諸佛法已更證菩提何以故已圓滿故不應更證師子勇猛言云何圓滿諸佛法耶答言佛法圓滿如真如圓滿真如圓滿如虛空圓滿如是佛法真如虛空亦無有二善男子如汝所言云何圓滿諸佛法者如色圓滿乃至識圓滿佛法圓滿

亦復如是師子勇猛言何者是色等圓滿文殊師利言善男子於意云何汝所見色是常耶是無常耶答言不也文殊師利言善男子若法非常非無常彼有增減耶答言不也文殊師利言善男子若法不增不減是名圓滿云何圓滿若於諸法不能了知則生分別若能了知則無分別若無分別則無增減若無增減此則平等是故善男子若見色平等即是色圓滿受想行識及一切法圓滿亦復如是爾時師子勇猛雷音菩薩白文殊師利言仁者得法忍來無一念心願成正覺而今何故乃勸餘人令向菩提文殊師利言我實不曾勸一衆生令趣菩提何以故衆生無所有故衆生性自離故若衆生可得則令向菩提既不可得故無所勸何以故平等無分別故非以平等而求平等亦無所起是故常說應觀諸行來無所從去無所至是名平等則是性空於性空中而無所求善男子如汝問我得

忍已來無一念心當得菩提者善男子汝見彼心耶而以此心得菩提耶師子勇猛言不也文殊師利何以故以心非色不可見故菩提亦尔但是名想若心名若菩提名皆無所有文殊師利言善男子如汝說我不生一念得菩提者是密意說何以故以心本來無有生故是故無生既無有生何得何證師子勇猛問言云何名為平等證入答言於諸法中無繫著者名平等證入者彼微細智亦不生滅與真如無異無可分別是名證入若正見修行者於平等中無一法可得離種種性亦不著一是名證入若以身證諸法無相明了彼相

官十

二

所謂無相而於身心亦不執著是則名為圓滿證入師子勇猛問言云何名得文殊師利言善男子以世間言說名之為得諸聖所得非言能說何以故法無依止離言說故復次善男子以無得為得亦非得非不得說名為得爾時師子勇猛雷音菩薩白佛言世尊善哉

願說文殊師利所得佛刹佛言善男子汝當自問文殊師利時彼菩薩白文殊言仁者當得何等佛刹功德莊嚴文殊師利言善男子若我求菩提汝可問其所得佛刹師子勇猛言仁者豈不求菩提耶文殊師利言不也何以故若有所求則有染著若有所染則有貪

愛若有所愛彼則有生彼若有所生是則有愛若有所愛終不於中而有出離善男子我爲是故不求菩提何以故菩提不可得故以不可得是故不求善男子然汝問我何等佛刹仁當得者我不能說何以故對於如來一切智者說自佛刹功德莊嚴即爲菩薩自讚已

德佛告文殊師利汝可自說以何等願莊嚴佛刹令諸菩薩聞已決定成滿此願時文殊師利受如來教即從座起偏袒右肩右膝著地合掌白佛言世尊我今承佛神力當爲宣說諸有欲求大菩提者皆應諦聽若聞此願當如實學令得圓滿文殊師利當以右膝著

官十

三

地之時十方各恒河沙等諸佛刹土六種震動時文殊師利復白佛言我從往昔百千億那由他阿僧祇劫已來起如是願我以無礙天眼所見十方無量無邊諸佛刹中一切如來若非是我勸發決定菩提之心教授教誡令修布施持戒忍辱精進禪定智慧乃至令

得阿耨多羅三藐三菩提我於菩提終不應證而我要當滿此所願然後乃證無上菩提時彼衆中諸菩薩等咸作是念文殊師利無礙天眼見幾如來是時世尊知諸菩薩心之所念即告師子勇猛雷音菩薩言善男子譬如以此三千大千世界碎爲微塵於意云何此諸微塵可以筭計知其數不答言不也世尊佛言善男子文殊師利無礙天眼見於東方無量諸佛復過是數南西北方四維上下亦復如是時文殊師利白佛言世尊我有是願以恒河沙等諸佛世界爲一佛刹無量妙寶間錯莊嚴若不尔者我終不證無上菩提

復次世尊我復有願令我剎中有菩提樹其量正等十大千界彼樹光明遍此佛剎復次世尊我復有願我坐菩提樹已證得阿耨多羅三藐三菩提乃至涅槃於其中間不起此座但以變化遍於十方無量無數諸佛剎土為諸衆生而演說法復次世尊我復有願令

我剎中無女人名純菩薩衆離煩惱垢具淨梵行初生之時袈裟隨體結加趺坐忽然而現如是菩薩遍滿其剎無有聲聞辟支佛名唯除如來之所變化往詣十方為諸衆生說三乘法尔時師子勇猛雷音菩薩白佛言世尊文殊師利當來成佛名為何等佛言善男

子此文殊師利成佛之時名為普見以何義故而名普見以彼如來於十方無量百千億那由他諸佛剎中普皆令見若諸衆生見彼佛者必定當得阿耨多羅三藐三菩提普見如來雖未成佛若我現在及滅度後有聞其名亦皆必定當得阿耨多羅三藐三菩提唯

官十

四

除已入離生之位及彼劣心者文殊師利又白佛言世尊我復有願如阿彌陀佛剎以法喜為食而我剎中菩薩初生起食念時即便百味盈滿於鉢在右手中尋作是念若未供養十方諸佛及施貧窮苦惱衆生餓鬼等類令其飽足而我決定不應自食作此念時得

五神通乘空無礙往於十方無量無數諸佛剎中以食供養諸佛如來及聲聞衆又於貧苦諸衆生類亦皆周給復為說法令離渴愛於一念頃還至本處復次世尊我復有願於我剎中諸菩薩等初生之時所須衣服於其手中隨意皆出種種衣寶鮮潔稱體應沙門服便作是念若未供養十方諸佛不應自用於一念中往詣十方無量佛剎以此衣寶獻諸佛已還至本處方自受用復次世尊我復有願我佛剎中諸菩薩衆所得財寶及諸資具要先分施諸佛聲聞遍供養已然後受用又我剎中遠離八難及不善法既無過咎亦

無禁戒無有苦惱諸不悅意時師子勇猛白佛言世尊而被佛刹名為何等佛言彼刹名隨願積集清淨圓滿師子勇猛言世尊彼佛世界在何方所佛言在於南方此娑婆世界亦當在彼佛刹之中文殊師利又白佛言我復有願我佛刹中積集無量妙寶所成復以

官十

五

無量摩尼妙寶間錯莊嚴其摩尼寶於十方界所未曾有甚為難得如是寶名俱脰歲中說不能盡隨諸菩薩樂見彼刹金為體者即見為金樂見銀體即見為銀然於見金未曾損減樂見玻璃琉璃瑪瑙赤真珠等無量諸寶各隨所見皆不相礙如是栴檀香體阿伽

羅香乃至赤栴檀等各隨樂見亦復如是又彼刹中不以日月摩尼星火等光之所照現彼諸菩薩皆以自身光明照於千億那由他刹又彼刹中以華開為晝華合為夜隨諸菩薩所樂時節即皆應之然無寒暑及老病死若諸菩薩隨其所樂欲證菩提即往餘刹於

兜率天壽盡降生而證菩提此佛刹中無有涅槃百千種樂於虛空中雖不現相而聞其音此樂不出願貪愛聲但出諸波羅蜜佛法僧聲及菩薩藏法門之聲隨諸菩薩所解妙法皆悉得聞又諸菩薩若欲見佛隨所詣處經行坐立應念即覩普見如來坐菩提樹若

諸菩薩於法有疑但見彼佛不待解釋疑網皆斷解了法義亦時會中無量百千億那由他諸菩薩眾同聲說言若有得聞普見佛名彼人便得最上善利何況生於彼佛土者若有得聞此文殊師利授記法門及聞文殊師利名者是則名為面見諸佛是時佛告諸菩薩言如是如是如汝所說善男子若有受持百千億諸佛名號若復有稱文殊師利菩薩名者福多於彼何況稱於普見佛名何以故彼百千億那由他佛利益眾生不及文殊師利於一劫中所作饒益亦時眾中無量百千億那由他天龍夜叉乾闥婆阿脩羅迦樓羅

緊那羅摩睺羅伽人非人等同聲唱言南無文殊師利童真菩薩南無普見如來應正等覺說此語已八萬四千億那由他衆生發阿耨多羅三藐三菩提心無量衆生善根成熟於三乘中得不退轉文殊師利又白佛言我復有願如我所見無量無數百千億那由他

官十

六

諸佛世尊而彼諸佛所有佛刹功德莊嚴如是一切皆令置我一佛刹中唯除二乘及五濁等世尊若我自說佛刹功德種種莊嚴過恒沙劫亦不能盡如我所願唯佛能知佛言如是文殊師利如來知見於三世中無有限礙尔時衆中有諸菩薩作如是念文殊師利

所得佛刹功德莊嚴與阿彌陀佛刹為等不耶尔時世尊知彼菩薩心之所念即告師子勇猛言善男子譬如有人拊一毛為百分以一分毛於大海中取一滴水此一滴水喻阿彌陀佛刹莊嚴彼大海水喻普見如來佛刹莊嚴復過於此何以故普見如來佛刹莊嚴

不思議故尔時師子勇猛白佛言世尊如是等類佛刹莊嚴於三世佛刹頗更有不佛言有善男子東方去此過百億恒河沙世界有佛刹名住最上願彼中有佛名普光常多功德海王彼佛壽命無量無邊常為菩薩而演說法善男子彼佛刹上功德莊嚴與普見佛刹等無有異善男子有四菩薩被不思議弘誓之燈而於此願決定成滿亦當得此佛刹莊嚴如普見如來時師子勇猛言願佛說彼菩薩名號及其住處復願示彼普光常多功德海王如來佛刹今此大衆多所利益何以故此諸菩薩若見聞已於此所願當得成滿

官十

七

佛言善男子汝等諦聽當為汝說善男子彼一菩薩名光明幢在於東方無憂德佛刹次名智上在於南方智王如來佛刹次名諸根寂靜在於西方慧積如來佛刹次名願慧在於北方那羅延如來佛刹尔時世尊以神通力現普光常多功德海王如來佛刹令此大

會見彼如來及菩薩衆并其佛刹功德莊嚴昔所未見亦未曾聞而彼一切皆不思議無量百千億那由他寶間錯莊嚴於一劫中說彼功德亦不能盡衆皆明見如觀掌中菴摩勒菓彼菩薩身長四萬二千由旬佛身長八萬四千由旬光明洞照如閻浮檀金山成就

廣大功德莊嚴坐大菩提樹下諸菩薩衆恭敬圍繞現百千億諸變化事往詣十方諸世界中爲諸衆生而演說法是時佛告諸菩薩言善男子汝等見彼如來佛刹莊嚴菩薩衆耶時諸大衆同聲白言唯然已見我等當學此菩薩行如文殊師利之所修行我等亦當

成就如此莊嚴佛刹爾時世尊熙怡微笑從其面門放種種色光照於無量無邊世界照已還來繞佛三匝從其頂入爾時彌勒菩薩白佛言世尊以何因緣現此微笑佛告彌勒此大衆中八萬四千菩薩見彼佛刹莊嚴之事雖皆發心當欲成就如是佛刹然於其中

有十六善大丈夫具勝志樂而發大心彼能成滿如文殊師利所起大願餘諸菩薩亦速當得阿耨多羅三藐三菩提所得佛刹功德莊嚴如阿彌陀佛刹彌勒當知諸菩薩等志樂既勝所成亦大志樂勝者言我成就如文殊師利莊嚴佛土其餘劣者雖以信心亦作

是語以此語業猶能棄捨六十億百千那由他劫生死流轉亦得圓滿五波羅蜜爾時彌勒菩薩見於四方光明幢等四大菩薩各坐瑠璃光明樓閣有百千億諸天圍繞兩華奏樂現大神變震動大地而來於此時彌勒菩薩即白世尊請問其事佛言善男子此四菩薩爲見我故四方如來各令至此時彼菩薩既到佛所頂禮佛足右繞三匝退坐一面彼四菩薩光明遍照此之大會爾時世尊告諸菩薩言善男子此四善大丈夫志願所趣皆不思議應當尊重請其法要而彼所願於諸菩薩最爲殊勝若有善男子善女人得見之

者必定當得阿耨多羅三藐三菩提棄捨二十億劫生死流轉具足圓滿五波羅蜜若有女人聞此菩薩名者速得捨離女人之身於是世尊即攝神力而彼佛刹忽然不現文殊師利白佛言世尊一切諸法皆悉如幻何以故譬如幻師幻為隱現諸法生滅亦復如是而此生滅即無生滅以無生滅是則平等菩薩修此平等便能證得無上菩提智上菩薩白文殊師利言於此菩提云何證得文殊師利言此菩提者非是可得亦非可壞非可住著智上白言而此菩提非以住得非不住得何以故以彼法性本來無生非曾有非當有亦非可壞是故無得文殊師利謂智上等諸菩薩曰云何名為說一相法門

彌勒菩薩曰若有不見蘊界處亦非不見無所分別亦不見集散是名說一相法門

師子勇猛雷音菩薩曰若不作種種分別此是凡夫法此是二乘法此則不違法性入於

官十

九

一相所謂無相是名說一相法門

樂見菩薩曰若有修真如行而亦不作真如之想於此甚深無所分別是名說一相法門

無礙辯菩薩曰若能究竟盡於諸法亦以此法為他演說是名說一相法門

善思菩薩曰若以思議入不思議此不思議亦不可得是名說一相法門

妙離塵菩薩曰若有不染一切相亦非染非不染無違無順亦不迷惑非一非二亦非種種不取不捨是名說一相法門

娑竭羅菩薩曰若有能入如海難入甚深之法而於此法亦不分別雖為他說而無說想是名說一相法門

月上菩薩曰若於一切衆生心行平等猶如滿月無衆生想是名說一相法門

離憂闍菩薩曰云何拔衆生憂箭謂我我所是彼憂根若能住我我所平等是名說一相法門

無所緣菩薩曰若不攀緣欲界色界無色界
聲聞法緣覺法及諸佛法是名說一相法門
普見菩薩曰若說法時應說平等法謂空性
平等亦無空想及平等想是名說一相法門
淨三輪菩薩曰若說法時應淨三輪謂所為
衆生我不可得亦不分別自爲法師於所說
法而無住著如是說法是名說一相法門
成就行菩薩曰若有能說於一切法修平等
行所知如實非文字說以一切法離言說故
是名說一相法門
深行菩薩曰若有能說了達一切甚深之法
亦不見彼能說所說及與所爲是名說一相

法門

如是無量諸菩薩等各以辯才演說一相法
門說此法門時三十七億菩薩得無生法忍
八萬四千那由他百千衆生發阿耨多羅三
藐三菩提心七千比丘不受諸法盡諸有漏
心得解脫九十六那由他諸天及人於諸法

官十

十

中得法眼淨

尔時師子勇猛雷音菩薩白佛言世尊此文
殊師利久如當得阿耨多羅三藐三菩提彼
佛壽命及菩薩衆其數幾何佛言善男子汝
當自問文殊師利時師子勇猛白文殊師利
言仁者久如當得菩提文殊師利言善男子
若虛空界爲色身時我乃當得無上菩提若
幻人得菩提我乃當得若漏盡阿羅漢即是
菩提我乃當得若夢響光影及以化人得菩
提時我乃當得若月照爲晝日照爲夜我乃
當得阿耨多羅三藐三菩提善男子汝之所
問應當問彼求菩提者師子勇猛言仁者豈
不求菩提耶答言不也何以故文殊師利即
是菩提菩提即是文殊師利所以者何文殊
師利但有名菩提亦但有名此名亦離無作
故空而彼空性即是菩提尔時佛告師子勇
猛言汝頗見聞阿彌陀如來聲聞菩薩諸衆
會耶唯然聞見佛言其數幾何答言非算數

思議之所能及佛言善男子如摩竭國量一斛油麻舉取一粒喻阿彌佛國聲聞菩薩餘不舉者喻文殊師利得菩提時菩薩眾會復過是數善男子如以三千大千世界微塵數劫比普見如來壽量劫數百分千分百千億分乃至算數譬喻所不能及應知彼普見如

官十

十一

來壽命無有算數亦無限量如有一人以三千大千世界碎為微塵第二第三人亦碎大千世界以為微塵復有一人取彼微塵從此東行過尔所微塵數世界乃下一塵又過尔所微塵數世界復下一塵如是次第盡諸微塵復有第二人亦持尔所微塵從此南行如前下塵次第展轉乃至塵盡西方北方四維上下各有一人所下塵數亦復如是善男子是諸世界可知數不答言不也佛言善男子如是諸人於彼十方所經世界若著微塵及不著者盡求為塵於意云何是諸微塵可以算計知其數不答言不也世尊若有計量心

則迷亂不能了知佛言善男子諸佛如來悉能了知彼微塵數設過於此如來亦知時彌勒菩薩白佛言世尊諸菩薩等為求如是大智慧故於大地獄無量億劫受諸極苦終不應捨如是大智佛言彌勒如是如是如汝所說何有於此大智慧中不生欲樂唯除下劣及懈怠者說此智時一萬眾生發菩提心尔時佛告師子勇猛言善男子於意云何如彼十人經十方界盡為微塵文殊師利當於尔所微塵數劫行菩薩道何以故文殊師利大願不可思議趣向亦不可思議得菩提已壽量亦不可思議菩薩眾會亦不可思議尔時師子勇猛白佛言世尊文殊師利發趣甚大所修之行亦復廣大乃於尔所微塵數劫不生疲倦文殊師利言如是如是善男子如汝所說於意云何虛空界有如是念度於晝夜時節歲月劫數等耶答言不也文殊師利言如是善男子若有覺一切法等於虛空彼微

細智無有分別亦無是念度於晝夜時節歲月諸劫數等何以故彼於諸法無想念故善男子如虛空界無有疲倦及熱惱想何以故設過恒河沙劫而虛空界亦無生起亦無燒滅非可破壞何以故以虛空界無所有故如是善男子若菩薩了一切法無所有已亦無

官十

十三

熱惱及疲倦等善男子彼虛空名亦無燒滅熱惱疲倦亦不動搖不生不老不來不去文殊師利名號亦無有熱惱及疲倦等何以故名字性離故說此法時四天王釋提桓因梵天王等及餘大威德諸天子等同聲唱言是諸衆生聞此法門獲大善利何況受持讀誦當知彼等所成善根極爲廣大世尊我等於此法門受持讀誦廣宣流布爲欲護持此深法故尔時師子勇猛白佛言世尊若有得聞如此法門受持讀誦思惟及發如此功德莊嚴佛利之心得幾所福佛言善男子如來以無礙佛眼所見諸佛及彼刹土若有善

薩以妙七寶滿彼諸刹奉施供養一一如來各盡未來際今此菩薩安住淨戒於一切衆生得平等心若有菩薩於此莊嚴功德佛刹法門受持讀誦復能發心隨文殊師利所學行於七步此二功德比前七寶布施功德百分不及一乃至算數譬喻所不能及尔時彌

勒菩薩白佛言世尊當何名此法門我等云何奉持佛言此法門名爲諸佛遊戲亦名諸願究竟亦名文殊師利功德莊嚴佛土亦名令發菩提心菩薩歡喜亦名文殊師利授記如是受持尔時十方諸來菩薩爲欲供養此法門故而兩衆華讚言希有世尊希有世尊我等乃得聞是不思議文殊師利師子吼莊嚴法門時諸菩薩說是語已各還本土說此法時恒河沙等菩薩得不退轉無量衆生善根成熟尔時文殊師利即入菩薩出生光明普照如幻三昧入三昧已令此衆會普見十方無量無邊諸佛刹中一切如來一一佛前

皆有文殊師利說自佛刹功德莊嚴衆會見
已於文殊師利殊勝大願生希有心佛說是
經已彼一切菩薩及諸比丘比丘尼優婆塞
優婆夷天龍夜叉輒闍婆阿脩羅迦樓羅緊
那羅摩睺羅伽人非人等聞佛所說皆大歡
喜信受奉行

十三末

大寶積經卷第六十

官十

大寶積經卷第六十一

人一

高齊北天竺三藏那連提耶舍譯

菩薩見實會第十六之一

序品第一

如是我聞一時佛在迦毗羅國尼居陀林與
大比丘衆千二百五十人俱其名曰優樓毗

一

螺迦葉伽耶迦葉那提迦葉摩訶迦葉舍利
弗大目捷連一切皆是大阿羅漢諸漏已盡
無復煩惱其心自在心善解脫慧善解脫如
大龍象所作已辦皆棄重擔逮得已利盡諸
有結於正教中心得善解於一切法心無所
礙到於彼岸自得解脫解脫眷屬自得調伏
調伏眷屬自得寂定寂定眷屬自得度脫度
脫眷屬已到彼岸彼岸眷屬已到陸地陸地
眷屬自得安隱安隱眷屬自得寂滅寂滅眷
屬自得煩惱破煩惱眷屬自得沙門沙門眷
屬自得息惡息惡眷屬自婆羅門婆羅門眷
屬自除惡法除惡法眷屬自了知諸法了知
諸法眷屬自能得度能度眷屬自具諸德具
諸德眷屬自無煩惱無煩惱眷屬自離五支
離五支眷屬自得離障離障眷屬自得靜意
靜意眷屬自具六通具六通眷屬自離憎愛
解脫離憎愛解脫眷屬自守護一心守護一
心眷屬自念門具足念門具足眷屬自依四